

**Naaja H. Nathanielsen  
Attaviitsoq**

**UPA 2016/115  
8. april 2016**

**Uunga siunnersuut: Inunngortunik toqusunillu nalunaaruteqartarnek, ilisinerit iliveqarfiillu pillugit Inatsisartut inatsisaat nr. xx, xx 2016-imeersoq.**

(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq)

Siullertut oqaatiginiarpara ajunngitsuummat sammisatsinni malittarisassat nutarterniarneqarnerat. Toqukkummi qimaguttoqarnerani pingaaruteqarpoq malittarisassat ersarissuunissaat inuiaqatigiinnilu nutaaliaasumik inuuffiusumut naapertuunnissaat.

Ataasiakkaannguanik allannguutissanik siunnersuuteqarpunga, neriuppungalu Inatsisartut Naalakkersuisullu isummerfigiumaaraat uku:

Paasinnittaasera naapertorlugu arsat arsanullu qummuattanik paaqqinninnernut siunnersuutip paragraffiani piumasaqaataasut siammasinnerusinnaapput. Erseqqissumik isumaqatiginngilara paragraf 7 immik. aappaat. Tassani allaqqavoq arsanut qummuattat taamaallaat palaseqarfinni uninngasuutigineqarsinnaasut arsanut qummuattap imaluunniit arsat siaruartinnissaata tungaanut. Paasinnittaasera naapertorlugu qimagaasut arsanut qummuattamik paarinninnissaat akornutissaqanngilaq, qularnanngilarlu tamanna ataqqinnissuseqartumik pisinnaasoq. Tamanna periarfissaasariaqarpoq. Tamakkiisumik isumaqatigisinnaanngikkaanni periarfissatut allatut ammaffigineqartariaqarpoq.

Tamassuma saniatigut aamma paragraf 7 immik. aappaanni isuma saqqummiunneqartoq aamma isumaqatiginngilara, tassanimi nalunaarutigineqarpoq sumiiffinni assigiinngitsuni arsanik siaruarterisoqarsinnanngitsoq. Tassanittaaq isumaqarpunga inatsit siammasinnerusumik periarfissiisariaqartoq.

Taamatut allannguutissanik marlussunnik siunnersuuteqarnera inuttut nammineq misigisannit tungaveqarpoq, taamaakkaluartorli ilimagaara inuit amerlanerit ilisarinniffigisinnaassagaat. Taamaattumik una oqaluttuarilaassavara.

Ataatagigaluarma aalajangerpaa toqoreernermi kingorna ikuallagaaniarluni. Kissaatigisimallugu inuunermini sunniuteqarfiunerpaasuni arsani siaruarneqassasut. Nuup kangerlua Qullissallu avataa. Toqoreernerata kingorna timaa ikuallanneqarfissaminut Danmarkiliaanneqarpoq, tamassumalu kingorna ilaqutariiusugut arsaasa qummuattaa tiguarput. Tigummivarput silap angallavissanngornissaata tungaanut, atorsaaleramat arsaata affai Nuup kangerluanut siaruarterpagut. Arsaata sinneri qatanngutaanut nassiuppagut, taassumallu ataatagigaluarma piumasai naapertorluinnarlugit arsata sinneri siuarpai. Tamakku pisut tamarmik ataatagigaluarma kissaatigisai ataqqilluinnarlugit piviusunngortinneqarput. Arlaanilluunniit ileqqorlunnermik taaneqarsinnaasumik pisoqanngilaq. Iliuuserisarput inatsisissatut siunnersuummi inerteqqutaalissaaq. Isumaqarpunga ataatatigaluarma kissaatigisaa kisiartaanngitsoq. Nunatsinni amerlaqaagut sumiiffinnut assigiinngitsunut iluunngarluta misigissuseqartut, aamma arsatsinnik siaruaanissamik kissaateqarsinnaasut. Tassungalu tungatillugu isumaqarpunga inatsit periarfissiisariaqartoq. Siunnersuutigineqartoq ataatsimiititaliamut suliarinnittussamut innersuuppara ataatsimiititaliarlu sulilluarnissaanik kissaallugu.